



Asocijacija mladih Općinskog odbora Stranke demokratske akcije Tuzla je Svečanom akademijom u Bosanskom kulturnom centru TK u Tuzli obilježila 20. godišnjicu postojanja i rada. Članovi Asocijacije su se zajedno sa predsjednikom Edisom Bajićem svojski potrudili da sve funkcioniše i izgleda besprijekorno, od samog ulaza u BKC, hola gdje su dočekivani gosti pa sve do te velike sale u kojoj je cijeli enterijer bio u znaku dvadesetodišnjice AM OO SDA Tuzla.

Prostor je bio mali da primi sve one koji su željeli da sa rukovodstvom i članovima Asocijacije podijele radost ovog velikog događaja. Koliko je AM OO SDA Tuzla značajna i respektabilna snaga SDA, dovoljno govori i dolazak predstavnika drugih političkih partija na ovu svečanost, ali i veliki broj čestitki koji su na adresu Asocijacije pristigle iz brojnih ambasada, ustanova BiH, Asocijacija mladih SDA diljem naše zemlje, političara, medijskih kuća.

Na samom početku Svečane akademije, prisutne je pozdravio predsjednik AM OO SDA Tuzla, Edis Bajić :



Asocijacija mladih OO SDA Tuzla danas je ovdje okupila Bosnu i Hercegovinu. Tu su prijatelji širom BiH ispred Asocijacije mladih SDA, a koji su stigli iz Konjica, Bosanskog Novog, Jajca, Bihaća, Sarajeva. Svjedoci ste velikog broja aktivnosti naše Asocijacije mladih, a vi ste garant da ćemo u predstojećem periodu raditi još više i bolje. Želim da se zahvalim onim ljudima koji su 1991. godine smogli snage i hrabrosti da osnuju Muslimanski omladinski savez. Naš zajednički cilj treba da bude jačanje BiH. Mi sada u miru trebamo raditi na okupljanju i usmjeravanju mladih ljudi u pravcu političkog i društvenog djelovanja za opće dobro, prosperitet i razvoj od nivoa lokalne zajednice do nivoa države Bosne i Hercegovine. Cilj u narednom periodu nam je

da radimo na institucionalnom jačanju položaja mladih i aktivnijem uključenju mladih u politički i društveni život u općini Tuzla i šire. Takođe, kao cilj imamo i bolju saradnju sa nevladinim organizacijama, svim strankama i podmladcima stranaka kao i sa predstavnicima vlasti, te zalaganje za uvažavanje mišljenja građana prilikom donošenja ključnih odluka na lokalnom i državnom nivou. Istakao bih naše pozitivne inicijative koje su preko naših mladih predstavnika pokrenute u Općinskom vijeću, a sve sa ciljem jačanja boljeg položaja mladih – naglasio je predsjednik AM OO SDA Tuzla Edis Bajić.

Bajić se zahvalio svim vijećnicima u OV Tuzla i poslanicima u Skupštini Tuzlanskog kantona i svih nivoa vlasti koji su prepoznali nastojanja predstavnika Asocijacije i podržali njihove inicijative. U ime svega onoga što su do sada učinili za AM OO SDA Tuzla, predstavnici Asocijacije su dodijelili i zahvalnice prvom predsjedniku MOS-a SDA Salki Bukvareviću i nekadašnjem predsjedniku AM KO SDA TK Semiru Fejziću.

Iznenadjenje večeri priredili su članovi AM OO SDA Tuzla, koji su predsjedniku Edisu Bajiću uručili skroman poklon za rad, trud, zalaganje i razumijevanje koje pruža svim članovima AM SDA Tuzla.

Prisutnima se obratio i prvi predsjednik AM SDA Tuzla mr. Salko Bukvarević : Izuzetna nam je čast biti članom državotvorne, demokratske i narodne stranke koja je u Asocijaciji evropskih narodnih stranaka. Kroz proteklih 20 godina svi pozitivni procesi odbrane i jačanja države BiH direktno su bili vezani za uticaj i snagu SDA. Uz iskrene čestitke AM OO SDA Tuzla, dozvolite mi i da vam uputim nekoliko preporuka : nemojte zaboraviti generaciju mladih Bosanaca čiju je mladost prekinula strašna agresija na našu jedinu domovinu BiH. Ta mladost je svojom hrabrošću u odbrani života, slobode, ljudskih prava svih građana BiH zadivila cijeli svijet i osvjetlala obraz države. Samo iz Asocijacije mladih SDA Tuzla je 9 zlatnih ljiljana, jedan narodni heroj i svi oni su posthumno odlikovani. Izgrađujte sebe, obrazujte se što je moguće više jer samo obrazovani možete graditi državu BiH. Želim vas iskreno pozvati da se aktivnije uključite u politička dešavanja i rad SDA jer vaše ideje i snaga trebaju našoj Tuzli i domovini Bosni i Hercegovini.

Svečanu akademiju u povodu 20. godišnjice AM OO SDA Tuzla je svojim prisustvom uvećao i predsjednik Skupštine Tuzlanskog kantona Bajazit Jarašević koji je rukovodstvu i članovima Asocijacije uputio najiskrenije čestitke. U svom izlaganju, Jarašević je ukazao na najveći problem koji tišti mladu populaciju, a to je zapošljavanje : Mi moramo dati strankama podršku u izmjeni Ustava BiH u obimu koji će našu zemlju brže voditi u evropske integracije, omogućiti joj brži put u NATO savez. Međutim, pitanje ekonomskog razvoja i zapošljavanje nismo do sada dovoljno stavili u centar našeg interesovanja. Moramo, poučeni iskustvom iz ove teške

ekonomske krize, kazati sebi da ćemo od sada dok smo živi dio Budžeta odlučno usmjeravati u ekonomski razvoj i zapošljavanje i da ćemo izmjenom zakona potaknuti poduzetnike da otvore nova radna mjesta. Za to im je potrebna podrška države koja je sporna. Zbog toga ja molim vas mlade ljude da o tome glasno govorite. Uvjeravam vas da ćemo u ovoj i narednoj godini jasno pokazati Tuzlanskom kantonu da to odlučno želimo staviti u centar našeg interesovanja.



Podršku i najiskrenije čestitke predsjedniku AM OO SDA Tuzla Edisu Bajiću, kao i svim članovima AM OO SDA Tuzla, u povodu 20. godišnjice uputio je i predsjednik AM SDA BiH Salmir Kaplan : Asocijacija mladih SDA mora biti organizacija koja će privlačiti mlade ljude, u kojoj će se prepoznati savremeni mladi čovjek i ne smije biti nešto što će se vezivati samo za prošlost. Svakako da mi baštinimo i prošlost i tradiciju, međutim AM SDA mora biti savremena. Mi koji imamo sreću da smo na rukovodećim pozicijama u Asocijaciji mladih SDA, moramo se boriti za bolju pozicioniranost. 25 % naših kandidata je bilo na listama za Opće izbore, 30 % ih je bilo na listama za lokalne izbore i s tim možemo biti zadovoljni. Međutim, ne možemo biti zadovoljni sa pozicioniranjem kandidata SDA na listama.

U povodu 20. godišnjice AM OO SDA, u Tuzlu je stigao i veliki prijatelj AM OO SDA Tuzla Senad Šepić, nekadašnji predsjednik AM SDA BiH, aktuelni potpredsjednik SDA BiH i direktor Političke akademije SDA : Ja vam od srca čestitam, i svima onima koji su uz Asocijaciju mladih SDA veliko hvala. Siguran sam da će ovi mladi ljudi u Asocijaciji ovdje u Tuzli, predvođeni vašim i našim predsjednikom Edisom Bajićem, to na najbolji mogući način opravdati. Sve ono što se desilo u proteklih 20 godina kada je u pitanju država BiH, nosila je ova stranka, a mladi ljudi su unutar tog programa dali svoj najveći doprinos. Zato svi večeras treba da budemo ponosni i da kažemo da u narednim godinama želimo da budemo još bolji i jači i organizovaniji. Prije tri godine smo pokrenuli Političku akademiju Stranke kao prvi i jedini projekat takve vrste u BiH s ciljem da educiramo, osposobimo mlade ljude i sve članove SDA za pozicije koje će preuzimati.

Ministar sigurnosti BiH Sadik Ahmetović je u svom obraćanju potsjetio na značaj i snagu SDA i njenu ulogu u očuvanju suvereniteta Bosne i Hercegovine kao i na važnost mladih ljudi za budućnost naše zemlje.

Nakon Svečane akademije u holu Bosanskog kulturnog centra TK je organizovan i koktel za sve zvanice, članove, simpatizere i prijatelje SDA.

Služba za odnose s javnošću OO SDA Tuzla